

SAC y SMAC no a uni sino a djis aclaría algun punto

ORANJESTAD - Tabatin rumornan ta circula cu lo tin un carta circulando cu reinanan di carnaval 60, cu ta cay bo di e organizacion di SAC no tin permiso pa participa cu otro organizacion di carnaval. Si haci esaki lo tin consecuencianan. SAC ta nenga di a traha of firma carta cu lo ta circulando rond. Sra. Tecla Kelly presidente di SAC a enfatisa cu SAC y SMAC no a uni.



Sra. Kelly a bisa cu e no sa ken a saca e carta aki, pasobra e no a mira e carta. "Esun cu a haya e carta mester presenta cu e carta of bisa for di unda el a hay'e." Segun sra. Kelly, tur e figuranan di carnaval 60 a wordo yama pa aclaría e parti ey y a puntra si nan

a haya e carta. "Automáticamente niun hende a haya e carta, pasobra e carta no ta existi. Pero pa dañá number di hende tur cos ta posibel," sra. Kelly a bisa.

Aclaracion

Esaki a haci cu e directiva di

SAC a yama presidente di SMAC Randy Thiel, pa ta presente ora cu a aclaría cu e grupo di figuranan di carnaval 60 tocante SAC su pensamiento di nan participacion cu carnaval 61. "SAC no ta kita niun hende di bay niun caminda. Mi ta kere esey no ta nos trabou como cu nos ta un organizacion di carnaval. SAC ta e organizacion mas bieu y tin e derecho di existencia. Esey kiermen cu SAC a pone e puntonan cla, den e parti di participacion pa eleccion di reina entre otro."

Union SAC SMAC

A puntra sra. Kelly riba su pensamiento pa uni cu SMAC pa organisa carnaval 61. "Pa SAC cu SMAC a join, e ora ey minister di cultura Otmir

Oduber, Gruponan Uni y Stichting Musica lo mester a acepta e proposicion di SAC cu ta encera un president nobo entre otro. Aparentemente minister ta prefera pa hacie e manera actual cu un organizacion nobo. SMAC ta un fundacion politico y di gobierno caminda cu prome minister a dicidi di duna SMAC permiso pa organisa carnaval 2015." Pues aworaki tin un organizacion autonomo y uno di gobierno, segun sra. Kelly.

"E palabra traha hunto a wordo duna na sr. Oduber." Segun sra. Kelly e minister no a gusta e idea masha y a bisa cu e lo lanta un organizacion cu ta capas pa haci e trabou. Sra.

Kelly a bisa cu e ora ey e no mester duda den e capacidad di e fundacion.

General

Apart di esaki e reunion a bay den bon esfera y cada hende a sali contento. E idea no ta pa tin bringamento.

E persona cu a lanta SMAC no tabata presente, pero el a manda e presidente, cu ken SAC a dialoga tranquil, sra. Kelly a bisa.

Sra. Kelly a bisa cu e sa e tarea di organizacion di carnaval exactamente como cu e ta presidente pa 12 aña. Mi a bisa SMAC ora ta trahando pa carnaval, e ta tuma 24 ora di e dia, constantemente riba pia. □

